

# SAN PABLO KARTA FXILIPÓS ÇXHABTEWE'SX JÏI

Pablo karcelte üsçxa Fxilipós çxhabte yakthê'jtx fxi'jni

**1** <sup>1</sup> Jesukristo's selpisáa Pablo vxite' Timoteo kwe'sxtha'w naa karta's fxi'jçxa kaja' Dxus luuçx Kristo Jesus yakh fxi'zesawe'sxtxi, Fxilipós çxhabte üssa yakthê'jwe'sx vxite' dxuus yatte jxkaahsawe'sx vxite' kxtee mjïi pu'çxsa jxukaysatx weçxana. <sup>2</sup> I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa, txâa pa'ga Dxus yakhçxáa mfxi'zewe.

**Dxus yakh fxi'zesawe'sx pa'gate Pablo Dxus yakh puutx we'weni**

<sup>3</sup> Bagaçxtewa i'kwe'sxtxi yaakx iisath Dxusa's weçxa'. <sup>4</sup> Sa' i'kwe'sx jxukaysa pa'gate bagaçxtewa wala weçxana Dxus yakh puutx we'we'th. <sup>5</sup> Txâa pa'gatey ja'daçxah mjïisatha'w Dxus yuwe's pta'sxna nyafxiitey takhçxa açxpkaçx. <sup>6</sup> Aça' na'wê i'kwe'sx ew fxi'zewa'ja's Dxusa' i'kwe'sxtxi pu'çxya' takhku na' Jesukristo naa kiwete sxawedna kîhpkçaçx pu'çxna nes yuuna txâ'wê yûuwa'ja's ew jiith. <sup>7</sup> Adxa' Dxus yuwe's pta'sxpa'gaçxáa açxha' karcelte üsthu. Nawa khuês tasxte pa'yama'tx pějxya' nawa Dxus yuwe ewsa yuja' jïna pta'sxna nes yu'nja, txâ'wêy i'kwe'sxwa tuuthe'j pu'çxna üsi'kwe. Txâa pa'ga adxa' i'kwe'sxtxi iiméh wala peeygâhna jxukaysatx peçxkanamée yajkxna fxi'zete', wala weçxa yuja'. <sup>8</sup> Jesukristowa ma'wêga peeygâh txâ'wêy adxwa i'kwe'sxtxi jxukaysatx iiméh wala peeygâani's Dxusa' jïia'. <sup>9</sup> Txâasath i'kwe'sx pa'gate Dxus yakh puutx we'wena pëyi' peeygâawa'ja's jweeifçxáa wala ji'phuçxa ma'wê fxi'zewa'ja'swa wala ew jii kîhte yuhwa jxpubakahmén, <sup>10</sup> kxah maa ewsatewa jiyuçxa txâ'sçxáa txhitxhçxa Dxus dxi'pte ew fxi'zeya' ajâne'kwe. Aça' txâ'wê fxi'zeçxa'. Kristo kîi ente' weh yuhwa yuuwe meesa yuune'kwe. <sup>11</sup> Txâ'wê yuukahn Jesukristo' jweeifçxáa wala pu'çxhina, i'kwe'sx ew yûuna fxi'zete' Dxusa' jweeifçxáa tuuthe'jni yuukahn.

**Adx itxi fxi'zeni' jxuka Kristo jii yuuçxá'**

<sup>12</sup>Yakhtêljwe'sx jiyukahn pta'sxya'wath: adxa's na'wê karcelte úswalj en pa'kh nawa txáa yu' jweeíçxáa Dxus yuwe's tuuthe'khanku txá'wê yuu. <sup>13</sup>Txáa pa'ga soldau jxukaysa maawa jxuka jiita' Kristo's selpiipa'gaçxáa preesu ústewa. <sup>14</sup>Aça' adxa' txá'wê preesu úsçxawa Dxus yuwe's úukhmée pta'sxiçte jiyuçxa', maa yakhtêljwe'sxwa txá'wêy úukhmeetx Dxusa's jweeíçxáa çxhâçxha yajkxna pta'sxi'. <sup>15-16</sup>Maaí yu' adxa's açeyajkçxatx Kristo kaapiya'jni's pta'sxi', adxa' preesu yál'j úste!, jweeíçxáa kxúusu'l'j wêçxa. <sup>17</sup>Naapkaçxha' vxite' adxa's pu'çxna ew yajkçxatx txá'wê yú!. Adx yu' preesu úsçxawa Dxus yuwe yu'sa' úukhmée pta'sxna ústewa jiçxatx txáawe'sxwa úukhmée ew yú!. <sup>18</sup>Adxa's açeyaakxa ma'k yuu khímeeçxa' açeyaakxsamée ma'k yuu nawa Kristo kaapiya'jni's maatxwa pta'sxníçxáa ewna. Txáa pa'gath adxa' weçxá'.

<sup>19</sup>Adx pa'gate i'kwe'sxa' Dxus yakh puutx we'wena úsne'kwe, naapkaçxha' Dxus Espirituwa pu'çxte!, preesu úsçxawa ew kaseje'nja súhnath wala weçxá'. <sup>20</sup>Txáa pa'ga makwe preesu úsçxawa weh yuhwa thaamemée, wejxwa Kristo yuuçxá's áate tuuthe'l'j wêeth. Nyafxíwa ma'wêtká tuuthe'je' áçxwa txá'wêyçxáa yu'nja. Txáa pa'ga makwe adx uuma'th meeçxa' uumeema'th nawa Kristo' tuuthe'jni nes yuuna. <sup>21</sup>Txáa pa'gatey naa kiwete adx itxi fxi'zenisa' jxuka Kristo jii yuuçxá', sa' uuçxa' Kristo yakh úsya' u'l'jwa'jsath. <sup>22</sup>Txáa pa'ga ma'sna txhitx wêçxawa ájaçmeeth, txá'wê naa kiwete nee fxi'ze'ççxa', Kristona selpiina úste!, wala ewsaíçxá' naa pa'ga. <sup>23</sup>Aça' txáa e'zsatx txhitxhwa'l'ja' adx yakha' thêya!. Ki'kinte' uuni wejx ewna Kristo yakh úsya' u'jni súhnath yaaki!. <sup>24</sup>Nawa naa kiwete nee itxi fxi'zeni wejx jxthaakwe peeja' i'kwe'sxtxi pu'çxna úswalj. <sup>25</sup>Txáa pa'ga naa kiwete nee uume'y i'kwe'sxtxi pu'çxna úswalj ji'phíçxáath, Dxus yakh çxhâçxha fxi'zekahn. <sup>26</sup>Aça' i'kwe'sxa' na'wê adxa's nee ús jxtháasu'i'kwe açá' Dxus pu'çxte! pa'ja'nja, Kristo Jesusa's weçxawa'l'ja's ji'phukahn.

<sup>27</sup>Kristo kaapiya'jniçxá's kxtey yuuna mfxi'zewe. Aça' bagaçxteçxáawa adx thegya' pa'l'ma'th meeçxa' pa'l'jmeema'th nawa Dxusçxá's çxhâçxha yajkxna teeçxa na'wêçxah jxukaysa Dxus yuwe's pta'sxna pa'pçxuna ústa' jiniçxá's jiyu wêeth. <sup>28</sup>Sa' açesawe'sxtxi ma'wê yuhwa úukhmée mfxi'zewe. Txáawe'sxa' jxukate vxituwal'jsaçxah txá'wê açetxna, naapkaçxha' i'kwe'sx úukhmée fxi'zesa' Dxus nwe'wenisaçxah txá'wê úukhmeene'kwe. <sup>29</sup>Txáa pa'ga Kristo's jxpa'gasa yál'ja' Dxus yakh wê't fxi'zewa'l'ja'sçxáa weçxana jxpa'gamée, Kristo's selpiipa'ga naa kiwete thêyte nxuste fxi'zewa'l'ja'swa weçxana jxpa'gawa'l'ja'. <sup>30</sup>Adxwa ma'wêtká açeni fxi'ze nyafxí', sa' áçxwa txá'wêyçxáa açeni ústhu txá'sa' jii i'kwe, açá' i'kwe'sxwa txá'wêy adx yakh ja'daçxah yahçena úsi'kwe.

**Kristo' áhmeekwesa na'wê yuuçxawa thaakwe walasa yuuna pa'jni**

**2** <sup>1</sup>I'kwe'sxtxi na'wêth yu'kxpeje!: Kristo peeygānisa Dxus Espiritu's úuste ji'phdxihçxa', txajx kvxiisxa'l'jni kçxhâaçxha'l'jni mfxi'zewe,

<sup>2</sup>teeçxsa na'wēçxah puutx ya'peeygāhna, teeçxsa na'wēçxaçxáa yajkxna. Aça' txā'wē fxi'zeçta' jīni's jiyuçxa', adxa' wala weçxa'nja.

<sup>3</sup>Iiwejçx yajkxna peekx wēt fxi'zewa'jçxá's yaakxwa'jme!, wejxwa iiwejçx yajkxmée vxitesatx jxthaakwe tuhthesa' sūhna txāawe'sxtxi ewçxáa yūuna mfxi'zewe. <sup>4</sup>Txā'wē peekx wēt fxi'zewa'jçxá's yajkxmée, wejxwa vxitesatx pu'çxna mfxi'zewe ew fxi'zewa'ja's txāawe'sxwa jiyukahn.

<sup>5</sup>Kristo' na'wēk yūuya' yajkx txā'sna i'kwe'sx mji'phuwe: <sup>6</sup>Kristo' Dxusiçxáak yu', nawa Dxus txakwe seena' wala jxtuhthesath sūhwa'j yu'sa' ji'phumée, <sup>7</sup>txā'wē yaakxwa'ja's jxuka nvxihtçxa kwe'sx āhmeekwesa na'wē yuuççax selpiiya' yajkx. <sup>8</sup>Txāasak āhmeekwesa na'wē yuuna pa'jçxa nxus nxus kluuste uuwa'ja'swa ji'phu, Dxusna nwēese'jçxa. <sup>9</sup>Txā'wē yūupa'gak Dxusa' cielun pe'jna u'jçxa maatewa jxthaakwe tuhthesa vxitçxa ki'p jxkaahwa'jsa. <sup>10</sup>Aça' cielute ūssa vxite' naa kiwete ūssa vxite' mtee mteewe'sxwa jxuka Jesus tasxteçxaçxáa peejxūkweçxa <sup>11</sup>na'jītxna: Jesukristo yuuçxáa maatewa jxthaakwe jxkaahwa'jsa' jīna Dxusa's weçxaatxna.

#### **Dxusa's jiisa' naa kiwete eena' kweethna fxi'zewa'ja'**

<sup>12</sup>Adx yakhthē'jwe'sx yaakxnisatx na'wēth yu'kxpeje': i'kwe'sx yakh adx kxtee ūççxa kaapiya'jni's wa'lmée i'kwe jxuka kxtey nwēese'je'. Txāasa āçxha' jwee'fiçxáa çxhāçxha Dxusa's yajkxna meswe, jxpubamée fxi'zewa'ja's pa'pçxuna, makwe adx yu' jxu'the ūstewa. <sup>13</sup>Txāa pa'gatey txā'wē ew yūuna fxi'zewa'ja's Dxusku kaaūusuthe'je', txajx jxthāasni's kxtey yuuna fxi'zekahn.

<sup>14</sup>Kīhtewa jxuka ewçxáa myūuwe nuywe'wena puimée. <sup>15</sup>Txā'wē ewçxáa yūute', kim yuhwa i'kwe'sxtxi yuuwesa ewmeesata' jīya' ājāmeetxna, wejxwa Dxus luuççx yuh yu'ta' yuuwemeesa jīnaçxáa we'wetxna, makwe naa kiwete nasa ewmeesa ksxavxyte ūstewa. Aça' i'kwe'sxa' eena' kweethsa na'wē mfxi'zewe txāawe'sx ksxavxyte, <sup>16</sup>Dxus yuwe itxī kaafxi'ze'jwa'ja's mtee mteewa pta'sxna. Aça' naa kiwete Kristo kīhte', adxa' kxulmeetka pa'pçxuna mjii sūhna wēt wēt yaaki'nja i'kwe'sx txā'wē ew yūuna fxi'zepa'ga. <sup>17</sup>Txāasath ūukhmée mji', makwe adx itxī fxi'zeni's ivxiituwa'j ma'k yuu i'kwe'sx pa'gate Dxusna selpiipa'ga, nawa txā'sa' ūukhmée weçxana kxtey yuuya' ūsthu. Txā'wē adx weçxani'sthu i'kwe'sx jxukaysatx pta'sxi', <sup>18</sup>adx na'wēy ūukhmée weçxana ūskahn.

#### **Timoteo vxite' Epafxrodito yakh kaahni**

<sup>19</sup>I'kwe'sx ma'wē fxi'zena ūstewa jiyuçxa weçxana ūsya', Dxus pu'çxte' Timoteo's dud kaja'nja i'kwe'sxtxi thegya' sūju'th. <sup>20</sup>Txā'wēme!, adx na'wēy i'kwe'sx pa'gate pa'pçxusa vxite yu' ji'phmeeth. <sup>21</sup>Vxite yu' ūççawa, peekx wēt fxi'zewa'jçxá'stxi yaaki', Kristo Jesus jxthāasni

yu'sa' yajkxmée. <sup>22</sup>Nawa Timoteo' txā'wē yu'çme!. I'kwe'sxa' jiiyā'ji'kwe ma'wēga wala selpíi Dxus yuwe's adx yakh pta'sx pu'çxna, peekx luuçx ma'wē neya's pu'çxhikx txā'wēk yūu. <sup>23</sup>Txāa pa'ga adxa's kīh yūuya'watewa jiyuna'wa, Timoteo's dud kaja'nja i'kwe'sxtxi pta'sxya'. <sup>24</sup>Meeçxa' adx yuu i'kwe'sxtxi thegya' yuhwaça', sūhçxa Dxusçxá'sthu neewe'we!.

<sup>25</sup>Yakthē'j Epafxrodito's i'kwe'sxa' kaahne'kwe adx peejinitx ktū'se'jçxa aça' ayte ūsa', adxa's pu'çxna pxthaa yuuna. Aça' txā'swa kaja'nja sūjū'th. <sup>26</sup>Txā'wē txajx açā'ni's i'kwe'sxwa jiyutx jini's wēsē'jçxa', txā' i'kwe'sx yakh wala puutx uy wēje'k, txāasak wala kuh yaaki!. <sup>27</sup>Isa açā'na weteçxa', uuwa'theçxáa yā'kh ūsu!. Nawa Dxusa' txā'sa' pu'çxku. Sa' txā'sçxáana pu'çxmée, adxnawa txā'wēyku pu'çx, na'wē nxusna ūsthu txāate jxthaakwe nxussa pa'khamén. <sup>28</sup>Txāa pa'ga txā'sa' dud kaja'nja sūju'th, txāa yakh i'kwe'sx puutx uyçxa' weçxana ūskahn. Aça' i'kwe'sx weçxana ūste', adxwa nxusmée weçxana ūsu'nja. <sup>29</sup>Txāa yakhthē'ja's wala weçxana mpa'gawe, sa' txāa na'wēysatxi's bagaçxtewa mpeeygāhwe. <sup>30</sup>Txāa yakhthē'ja' Kristo's selpiipa'gaçxáa txajx itxi fxi'zeni's ivxiitu'dxijk, txā'wē i'kwe'sx yu' adxa's pu'çxya' ājāmeetewa, txāa yu' adxa's selpiina ūsçxak txā'wē u'dxih.

### Dxus dxi'pte ew fxi'zewa'ja's Dxus i'çxáak ūsu'

**3** <sup>1</sup>Āçxha', yakhthē'jwe'sx, Dxus yakh weçxana mfxi'zewe. Nyafxíi neewe'wena fxi'th txā'wēyçxáa açxwa neewe'weçthu, i'kwe'sxtxi' selpiwa'jsa' naa pa'ga. <sup>2</sup>Nasa ewmeesa kaypuba'jna fxi'zesatxi's mpa'yajkxwe, peekx kakwetewe'sxa's spē'thsatx. <sup>3</sup>Ew jiyute yu', Dxusa's ūusuh jxuka yajkçxçxa neewe'wesa kwe'sx txā'wē Dxus luuçx cirkuncidāynisatha'w. Txāa pa'gatey Kristo Jesus jii yā'tha'w sūhçxa weçxanatha'w fxi'ze' naa pa'ga. Sa' kwe'sx ājāni kakwekhēwe'sxa's weeçx yajkxna fxi'ze'çmeetha'w. <sup>4</sup>Txāatx yaakx wēewaç yu', adxwa weeçx yajkxya' āja'nja, kimtewa jxthaakwesath naa pa'ga. <sup>5</sup>Adx āaga yuuni oçxo en yuuçpkaçxha', cirkuncidāynisath. Sa' Israel nasath, Benjamin jii'th. Sa' mama tutxhu kasejii hebreo nwe'sxth yu', tatawe'sxa' judiutx yu' txāa pa'ga. Khīçxawa adxa' fxariseoth yu', judiuwe'sx ley ma'wē jxkaathewa jxuka kxteyth yuuna fxi'zesa yu'. <sup>6</sup>Txāasath ley kaapiya'jni's nwēese'jna Kristo nasatxi's ikhya' pakwé', Dxusna selpiçthu sūhçxa. Aça' adxa's kim yuhwa ley jxkaahni's kxtey yuume' jīya' ājāmeetxna.

<sup>7</sup>Nyafxíi yu' txā'wēsa' adx yakha' seena' yuh wala ewsa yu'tx. Nawa āçxha' Kristo's jxpa'ganijū' txā'wēsa' kīhte yuhwa seelpimeetx yuuna pa'j. <sup>8</sup>Āçxha' Kristo Jesusna ew jiyuwa'j wejx jxthaakwe wala ewsa', naa pa'ga txā'wēsaxi' jxuka nvxihtçxath fxi'ze'. Kristoçxá's selpiina fxi'ze wēeçxa kījkīhnawa jxuka nvxihtthu seelpimeesatxi's, txāa yakh yuuçxáa fxi'zeya'. <sup>9</sup>Txā'wē ley jxkaahni's kxtey nwēese'jçxa ew fxi'zewa'ja's jii'phumeeth.

Txã'wê ew fxi'zewa'ja's Dxusku ùs, Kristo's ùsuh jxuka yaakxpa'ga. <sup>10</sup>Txãasa Kristo yuuçxá's ew jiyuçxa txãa ma'wêne! uuçxa ki' itxi yuu txã'wêy yuu wêeth. Sa' txãa na'wêy pxthaa yuuçxa uuwa'jnawa ji'phuçxa, <sup>11</sup>uunijüwa ki' itxi yu'nja süjü'th.

### Dxus dxi'pte ewsa yuuna pa'jwa'ja's pakwena nes yuuni

<sup>12</sup>Txã'wê Kristo's jxuka jiiyã'th jĩ'çmeeth, sa' Dxus dxi'pte ewsayã'th süju'çwameeth. Nawa txã'wê yüuwa'ja's äjä'nja sühnaçxáath pa'pçxuna nes yu'. Kristo Jesusa' adxa's txãa jiiik vxitna pa'j açã' açha' adxa' Kristo jiiith sühnaçxáath pa'pçxuna fxi'ze'. <sup>13</sup>Yakthê'jwe'sxtxi na'ji'th na': Kristo's jiyuwa'j peejiçxáath sa' Dxus dxi'pte ew fxi'zema pa'jwa'j peejiçxá' süjü'th. Açã' txãatx kxtey yuu wêeçxa na'wêth yü': nyafxíi fxi'zeni's peçxkanaçxa, na'wê jiyuna jxã'jwa'j üsta' txãaçxáatxthu wejx pa'pçxu'. <sup>14</sup>Txãatx jxuka ew jiyuna pa'jçxa', Kristo Jesus tasxte üsya' Dxus pa'yak kxtee üsu'nja süjü'th.

<sup>15</sup>Dxusa's ewyã'j jiisa' jxukaysa na'wê pta'sxi'th txã'wêçxaçxáa yaakxwa'j ji'ptha'w. Meeçxa' jxpubawá'kwe nawa Dxusa' ew äate kaajiyu'juna. <sup>16</sup>Na'wê Dxus yakh ew fxi'zewa'ja's jiiyã'tha'w txã'sa' peçxkanamée kxtey yuuna fxi'zewa'j ji'ptha'w.

<sup>17</sup>Yakthê'jwe'sx, adx na'wêy mfxi'zewe. I'kwe'sxtxiwa ma'wêtkaw kaapiya'j txã'wêy vxite yakthê'jwa üsta' ew fxi'zesa, açã' txãawe'sx na'wêy mfxi'zewe. <sup>18</sup>Wala kujus iipta'sxyã'th, nawa ki' peena pta'sxiçthu ü'nena: maafi yu' Kristo kluuste uuni's açesa üsta'. <sup>19</sup>Txãawe'sxa' ü'wa'ja's yuuçxáa dxus na'wê yajkxna fxi'zesata', sa' thaamewa'ja's yaakipkaçxte thaampa'su yu' iwejçx yaakxsaçxáata'. Nawa nmehte' jxuka ivxiituni yuutxna. <sup>20</sup>Naapkaçha' kwe'sx yu' cielute üswa'jsatha'w. Txãasa üythasna üstha'w, kwe'sxtxi nwe'wesa Jesukristo cielujü kiijana sühna. <sup>21</sup>Txã' kwe'sx kakwe seelpimeesa's yu'ptheçxa, txajx kakwe na'wêy ewsa vxituna, Kristo' ma'wê yüuwa'ja'swa jxuka äjäwa'jsa' naa pa'ga.

### Pejka Dxus yakh yuuçxáa weçxana mfxi'zewe

**4** <sup>1</sup>Adx yakthê'jwe'sxtxi yajkxte', wala weçxa yuja', Dxus yuwe's jiyuçxa jxpubamée üste'. Açã' i'kwe'sxtxi wala peeYGähna neewe'we'th: Dxusna peçxkanamée çxhãçxa yajkxna meswe.

<sup>2</sup>Ewodia vxite' Síntike txãawe'sxa' e'zii Dxusa's üuste jxpa'gaçxa fxi'zeççxa', puimée fxi'zekahnthu neewe'we'. <sup>3</sup>Sa' txãa e'z u'ytxi's yu'kxpejkahn idxna neewe'weçthu, adx yakh mjii pu'çxna u'jusag naa pa'ga. Txãa e'z u'ywe'sxa' nyafxíia' adx yakh Dxus yuwe's wala pta'sx pu'çxtxi, Klemente vxite' adx yakh mjii pu'çxsawe'sx yã'jçxa. Açã' txãawe'sx yase' fxi'jni yã'j üsta' bagaçxte yuhwa uuwa'jmée itxi fxi'zewa'j librate.

<sup>4</sup>Dxusna çxhãçxa yajkxna fxi'zeççxa', weçx weçxa yajkxna mfxi'zewe. I'kwe'sxtxi peena neewe'weçthu, weçx weçxa fxi'zekahn. <sup>5</sup>Kxah maawa

i'kwe'sx ew yūuna fxi'zeni's jiyukahn, i'kwe'sxa' Dxus yakh ew fxi'zewa'lj yuuçxá's pa'pçxuna meswe, Kristo kīiwa'ja' ājaçyā'ja' naa pa'ga.

<sup>6</sup>Weh yuhwa nxusmée, wejxwa Dxusçxáana neewe'wena meswe. Kīh peejçxawa, txā'sna jxuka mpējxwe weçxana. <sup>7</sup>Txā'wē yūute', Dxusa' ūsuna ūuste wēt yaakxwa'lj seena' walasa's. Aça' ūuste wēt yaakxwa'ja's jxpa'gate'l, wala yuh weçxa yuja'. Txā'wē Dxus ūsni ūuste wēt yaakxni's ew āate pta'sxya' ya'āja'çme', txā'wē seena' walasa pa'ga. Txāa wēt yaakxwa'ja's jxpa'gasayā'ja', Kristo Jesus yakh wētçxáa yajkxna fxi'zene'kwe.

### Dxus dxi'pte ew fxi'zewa'ljçxá's yajkxna fxi'zeni

<sup>8</sup>Yakhthē'jwe'sx na'wē yajkxna fxi'zekahn neewe'weçxa nmeh nvxiituçthu: kījkihwa i'kwe'sx ūuste suwwa'jsamée ew Dxus dxi'pte kaafxi'ze'ljwa'jsa yuuçxá's mpapçxuwe, īsxiimée isasaçxá's we'wena, ewçxáa yūuna kīhtewa jxpubamée. <sup>9</sup>Adx kaapiya'jnitx ūusuh jxuka jxpa'gaçxa ūsçxa' txāatxi' kxtey yuuna mfxi'zewe. Adx ma'wē jxkaahçxa' ki' ma'wēne'tka yūuna fxi'ze txāatxi' txā'wēy myūuwe. Aça' i'kwe'sx ūuste wēt yaakxwa'ja's ūssa Dxusa' i'kwe'sx yakh nes yuuna.

### Fxiliposwe'sx Pablo's ofxreda peesni

<sup>10</sup>I'kwe'sxa' adxa's ki' yaakxpa'ga adxa' wala weçxa'th. Nyafxí' peçxkanane'kwe sūhçxa txā'lji'çmeeth. Txā'wē peçxkanameeçxawa pu'çxya'çxáa ne'kwe ājámée ūsu' sūjū'th. <sup>11</sup>Kīhwa jil'phmée peejiinath ūsu' jīçxa txā'lji'çmeeth. Txāa pa'gatey adxa' piyath kījkuē jil'phuni yakhçxáawa weçxana fxi'zeya'. <sup>12</sup>Kīh yuhwa jil'phmée fxi'zeni's jiith, sa' wala jil'ph fxi'zeni'swa jiith. Txik ūswa'lj ma'k yuu meeçxa' wēna fxi'zewa'lj ma'k yuu nawa ma'wē fxi'zewa'lj en pa'thewa maa sūhmée ūsya'th piya. Kīhwa pejiima'th pejiimeema'th nawa txā'wē fxi'zewa'ja's jxuka piyath. <sup>13</sup>Txāa pa'gatey naa kiwete makwe wala thēysa nxussa pa'thewa, Kristo yuuçxáak pu'çxna nes yu', çxhāçxha kaafxi'ze'ljna. <sup>14</sup>Makwe txā'wētewa, i'kwe'sxa' ew i'kwe yūu, adx peejiina fxi'zeni's pu'çxna.

<sup>15</sup>Adx nyafxçxah Macedoniasu Dxus yuwe's pta'sxya' u'ljweçte', adxa's kim yuhwa pu'çxmeetewa, i'kwe'sx yuuçxáa i'kwe adx peejini's pu'çxna kaah, adxa' i'kwe'sxtxi kaapiya'th Dxus yakh fxi'zewa'ja's naa pa'ga. <sup>16</sup>Sa' adx Tesalonikate nee ūsiyna i'kwe'sxa' ki' vxyuu kaaji'kwe adx peejini's pu'çxna. <sup>17</sup>Txā'wē adxna kīhçxáawa peeste', txā'sna jxpa'gawa'ljçxá's yajkxna fxi'ze'çmeeth, wejxwa txā'wē yūupa'ga Dxusa' jwee'içxáa wala peesuna i'kwe'sxtxi's sūhnaçxáath yaaki'. <sup>18</sup>Efafxrodito yakh vxyuu kaakhwe txāaçxáa adx peejinite jxthaakweyā'ja'. Txāa peesya' kaahnisa' Dxus dxi'pte iiméh wala ewsa yu'k, Dxusa's weçxana peesnisa ne' yu' naa pa'ga. <sup>19</sup>Aça' adx Dxusa' i'kwe'sx kīh peejiina ūstewa, jxuka ūsuna

pejiikahmén, txãa pa'gatey Kristo Jesusa's jxpa'ganijũ' Dxus jii yu'sa' kîh yuhwa peejxmée jxukak ya'jypa'ga'. <sup>20</sup>Txãa pa'ga kwe'sx Tata cielute ũssa's weçxana nes yuuwa'ja' bagaçxtewa.

**Dxus luuçx jxukaysatx yuwe weçxaa kaahni**

<sup>21</sup>Dxus luuçx jxukaysatx yuwe mweeçxawe, Kristo Jesus yakh fxi'zesawe'sxtxi. Txã'wēy adx yakh ũssa yakhthē'jwe'sxwa yuwe weçxaa kaja'tx. <sup>22</sup>Sa' Dxus luuçx Cesar tasxte selpiina ũssawa jxukaysa yuwe weçxaa kaja'tx.

<sup>23</sup>Kwe'sxtxi jxpe'jsa Jesukristo' i'kwe'sxtxi' pu'çxhina ewçxáa kaafxi'ze'jna.